

1615.

2^e Part in 12.

LE
SECRETAIRE
DE SAINT
INNOCENT.

1615.

THE NEWBERRY
LIBRARY

Case
F

39

.326

1615A



LE
S E C R E T A I R E
DE S. INNOCENT.

IL n'est pas jusqu'au Iardinier qui ne parle quelquefois bien à propos, dit l'ancien Prouerbe. Que si cela est vray du Iardinier, pourquoy non du Charbonnier? & si du Iardinier & du Charbonnier, pourquoy non du Crocheteur? & si du Iardinier, du Charbonnier, & du Crocheteur, pourquoy non d'un Secretaire de S. Innocet, qui est plus honnestre homme qu'un Iardinier, qu'un Charbonnier, & qu'un Crocheteur? La suffisance & la capacite ne sont point attachees aux qualitez, aux habits, ny aux moustaches, comme pensent quelques mignons dedaigneux, ains à cette piece ronde pour laquelle se font toutes les calottes & tous les chappeaux. C'est par là qu'il faut prendre la mesure du merite d'un chacun. Ce

que ie dis pour preuenir le dégoust arrogant de ceux qui iugeants de la bonté des escrits par la condition de leurs auteurs, croiroient peut estre se faire tort de lire ce qui vient d'un homme de ma profession. Laquelle ne me fait pas neantmoins si peu d'honneur, qu'il n'y ait encore un des Marguilliers & deux Bourgeois de la parroisse qui me saluent les premiers quand ils me rencontrent, & me dient en passant, **DIEU** vous gard, Monsieur. Qu'en pourroit attendre dauantage un Gentilhomme de dix mille francs de rente? Il s'en sentiroit bien fort honoré. Si ce n'est, possible, qu'il fust de ces fanfarrons qui prendroient à injure qu'on recommandast leur personne à autre protecteur qu'à la garde de leur épée, ainsi que fit n'y a pas long temps un que ie voy tous les iours par la ville avec une moustache en grand volume, à l'ombre de laquelle se camperoit trois bataillons de hannetons.

Mais sans amuser plus longuement ceux qui ont plus d'argent que de loisir, il faut que ie vous entretienne à un sou pour teste de ce qui se passa il n'y a que trois ou quatre iours entre un Charbonnier, un Crocheteur & moy dans le cloistre de S. Innocent, où j'ay esleu domicile de ambulatorio pour vous seruir quand il vous plaira, en bien & en honneur cela s'entend, ainsi que m'aprit à dire feu maistre Denys Bouquet qui tenoit jadis

durant mon enfance petites escholes en la
 ruë des Noyers vers les Carmes, & mainte-
 nant presche le Carefme aux Toupinambous.
 Ils vindrent donc tout droit à moy, & m'ayās
 salüé selon leur mode, parabregé, me tire-
 rent à part, ayants, disoient ils, quelque cho-
 se d'importance à me communiquer, si ie
 leur promettois de le tenir couuert. Ne dou-
 tez nullement, leur dis-ie, de me découvrir
 confidemment vos intentions; vous voyez
 que j'ay les dents toutes gastees, cela proce-
 de du grand nombre de secrets que i'ay laissé
 pourrir dans ma bouche faute de les éuenter
 avec la langue. Il ne se fait quasi rien dans Pa-
 ris que ie ne sçache par le moyen des seruan-
 tee qui m'employent quelquefois pour écri-
 re en leur pais. Et DIEU sçait avec quelle
 naïfueté elles me racontent par le menu tout
 ce qui se fait dans la maison depuis la caue
 iusqu'au grenier. Mais que ie l'aille apres rap-
 porter ailleurs, j'aimerois mieux estre Abbé
 ou Euesque. Cela ne m'aduiendra jamais.
 Hier mesme ie sçay ce que me découurit vne
 qui demeure en la ruë des Rosiers; à peine
 trouuerois-je qui le creust, si ie l'auois dit.
 C'est chose étrange que ce qu'elle me recita
 de ce qui se passe en son logis. Au demeurant
 jolie femme & qui me paya tresbien. Pour ce
 regard, dit le Charbonnier, vous ne serez pas
 malcontent de nous, qui auons encore cha-
 cun vne piece de cinq soulds de reste apres a-

uoir beu. Mais il faut que vous nous fassiez quelque chose de bon. Qui fut bien aise d'une si belle & vtile occasion, à laquelle chaque biffexte n'en porte pas deux semblables, ce fut moy. C'est pourquoy ie mis aussi tost mon eloquence à l'emble, & déployay mes fleurs de bien dire. L'honnesteté, leur va je dire, qui reluit en vos paroles pleines d'autant de courtoisie que de sagesse, chose rare en personnes de vostre vacation, excite en moy vn grand & ardent desir de vous rendre en cecy & en toute autre chose le seruice que vous meritez. Commandez seulement. Du reste, laissez moy faire: Ie n'ay pas peur DIEU mercy, que quand j'auray la plume à la main, j'aye besoin d'aller rien emprunter de ceux qu'on prise le plus dans la Sorbone, le Palais ou le Louure. Ce fut moy qui aiday Iacques Bonhomme à faire la lettre que vous sçauiez, qui pour vous dire la verité, eust bien plus senty le païsan ou le Picard qu'elle ne fait, quelques liures qu'il se soit fait lire, si ie n'eusse vn peu dégrossi son patois. Mais dequoy est-il question?

Lors le Crocheteur, petit homme noiraut s'appuyant sur son baston, de répondre au Sire Benoist, dit-il, Quoy pour des esguillettes, dis ie? il me fera encore ie m'asseure bien credit de quelque demi-douzaine, car nous nous cognoissons depuis l'annee passée que nous nous rencontrâmes à Bagnollet. Ce n'est pas

cela, me va-il dire: Nous entendrons de faire
 escrire contre ce qu'il a fait imprimer ces
 iours passez, & monstrier qu'un peu de guer-
 re feroit grand bien a beaucoup de gens. Je
 m'étonnay de l'humeur de ces pauvres lour-
 daux & leur répondis. Mes amis, vous me
 voulez faire entreprendre chose fort diffi-
 cile. Car il est impossible de persuader à un
 homme sage que la guerre puisse iamais ap-
 porter aucun bien ou soulagement au peu-
 ple. Où les raisons pour prouver cela? Le
 Charbonnier haussant le sourcil sur ces paro-
 les, faute d'y avoir bien pensé, dit-il, vous en
 parlez de la façon. J'ay un soldat logé dans la
 maison que ie tiens, ie voudrois que vous
 l'eussiez ouï là dessus; car il entend le Latin &
 parle comme les liures, quand il s'y met. J'é-
 tois au commencement comme vous, mais
 il ma fait cognoistre depuis qu'il est plus sca-
 vant que moy. Et dernièrement il avoit à m'a-
 priere commencé de mettre ses raisons par
 écrit sur ce sujet, mais il fut empesché de con-
 tinuer par une défluxion sur le bras droit qui
 le tient encore au lit. Je luy répondis. Et dou-
 rez-vous que ce ne soit une punitiō de Dieu?
 Voyez seulement, me repart-il, ce peu de li-
 gnes qu'il avoit tirées sur cette matière, &
 vous me confesserez apres qu'il entend le gri-
 moire, & meriteroit d'estre President au mor-
 tier. Je prends un papier qu'il me donne, & en-
 lis le commencement tout haut. Il prouvoit

que la guerre estoit necessaire par cette raison, que les loix maintenans la grandeur & felicité des Estats, & les meilleures loix nais-
sans des plus mauuaises mœurs, comme a dit vn Ancien, la guerre estant la source de toutes sortes de corruptions & deprauations estoit aussi l'origine des plus sainctes & plus salutaires polices, & par consequent de la prosperité des Royaumes. Ce que quand i'eus leu, ie ne me peus tenir de m'écrier, ô Philosophe capable de faire accroire aux Quinze-vingts qu'il est nuict en plein midy ! Ie ne sçay comment il se trouue des hommes au monde si dénaturéz que de loüer la guerre qui est la peste du genre humain. Sur cela il m'interrompt. Et comment la peste du genre humain celle qui est la cause de la duree du monde ? Et voyant que ie me mocquois de cette proposition, il m'aduertit de tourner le fueillet & le lire, ce que ie fais & y trouue ces paroles. *Il n'y a rien qui fasse tant durer le monde que la guerre : car c'est l'opinion de plusieurs grands Docteurs que le monde finira lors que les sieges des Anges seront remplis. Or est-il que la guerre estant la mere & pepiniere de toutes sortes de vices & de meschancetez, fait damner beaucoup de gens qui autrement eussent peu faire leur salut, s'ensuit donc qu'elle retarde ce remplacement celeste, & par mesme moyen le iour du dernier iugement.* Ie fais semblant d'acquiescer à cette opinion pour auoir le plaisir du reste. Voyla qui va bien, dy-ie, posons que comme cestuy-cy dit,
la

la guerre soit si vtile, encore faut-il vn pretexte particulier pour celle que vous voulez persuader. Le Crocheteur reprit la parole. Et quel meilleur pretexte, dit-il, que tant de desordres contre lesquels on crie tant tous les iours par les ruës? On à répondu si souuent à tout cela, dy ie, qu'il ne seruiroit de rien d'en parler. On n'en à touché, dit-il, que les moindres. Il y en a tant d'autres. Quelle villenie qu'on ne puisse mes huy quasi plus aller par Paris à cause des carrosses & des charrettes dont le nombre accroist chacun iour? I'ay veu le temps que les petits enfans iouoyent au volant sur le pont nostre Dame aux iours de festes, plus aisément qu'ils ne font au iourd'huy au pré aux Clercs. A cette heure le moyen? Ce ne sont que Courtisans & que Dames, avec tant de piaffe & de magnificence, qu'il semble que les ruës soient toutes pour eux. Ces grandes pensions qu'on donne de par le diable, en sont cause. Car ceux qui en iouyissent estiment estre obligez de les venir manger à Paris. Cest ce qui fait que les viures & les logis y sont si chers, & qu'il faut plus d'argent tous les ans pour entretenir le paué, qu'il n'en faudroit pour bastir vne petite ville sur Montmartre. Et de tout cela les pauvres Artisans portent l'incommodité. Car a peine peut-on en trouuillant nuict & iour fournir aux necessitez & bombances de tant de gens qui abordent en cette ville. Habits, meubles, armes,

harnois, cheuaux, queſcai- ie? Voyez le pauvre
maître Marin le Mareſchal; il a tant d'affai-
res d'un coſté & d'autre pour contenter ceux
qu'il enuoyent querir, qu'il eſt contraint de
tenir vn cheual à l'eſtable & d'aller en houſſe
par la ville, comme le commis de quelque fi-
nancier. Je fus dernièrement à Monsieur S.
Maur la veille de la S. Iean. I'y rencontray
deux compagnons Serruriers de ma co-
gnoiſſance qui y auoient amené leurs mai-
ſtreſſes la nuit faute de iour. Ils ſe plai-
gnoient à elles qu'ils auoient tant de beſon-
gne qu'à peine pouuoient-ils prendre le loi-
ſir vne fois la ſemaine de leur aller donner la
collation à leur logis. C'eſt vne pitié que ce-
la, ie vous aſſeure: Au demeurant tant de ba-
ſtimens qu'on eleue en tant d'endroits avec
vne ſi grande dépenſe, ne ſont- ce pas autant
de témoignages contre le Sire Benoïſt qui
ſouſtient que tout va bien? Ne voit-on pas
que c'eſt pour nous oſter l'air peu à peu, com-
me on a déjà fait la terre, & puis le vendre à
ceux qui en voudront auoir? Les étrangers
qui paſſent dans Paris, ſe plaignent qu'on ne
peut voir la ville à cauſe des maiſons. Il y a
plusieurs autres deſordres ſemblables que ie
déduirois par le menu, ſi ie ne craignois de
m'altérer, à cette heure qu'il fait ſi chaud. Car
le nombre en eſt ſi grand que s'ils eſtoient
tous eſcrits en parchemin, ie ne voudrois
pas entreprendre de les porter depuis le

Louure iusqu'au Palais pour autant de sols qu'il y a d'iurogues de mon mestier. Vn chacun les voit ; mais il y en a qui ferment les yeux dessus & puis crient qu'il n'y en a point. Sçauiez vous quelles gens ce sont, ainsi que disoit ces iours passez vn Conseiller de la Cour pour lequel j'apportay quelques trente six sacs au Palais durant trois iours? Ce sont mauuais François qui voulants vendre ce Royaume au Roy d'Espagne, cachent les defaux qui y sont, à fin de le faire valoir & en tirer plus d'argent. Je l'interrompis là dessus parce quel'heure du souper approchoit, & luy dis: Mais en fin que voulez vous dire par là? Qu'un peu de guerre purgeroit tout cela, dit-il. Je me mets à rire, & ô le bon conseil, dis-je; C'est comme qui persuaderoit à vn homme de mettre le feu à sa maison pour en chasser les souris & les punaises. Voyez vous, compere mon amy, chacun sçait son mestier: Si vous estiez dans vn nauire il faudroit obeyr aux nautonniers & les laisser faire, encor qu'il vous semblast qu'ils n'allassent pas droict comme il faut. Si vous vouliez leur contester trop opiniaistrement, ils vous feroient entrer l'eau dans vos souliers par le collet de vostre pourpoint. Ainsi faut-il que nous en fassions en ce qui est de la conduite del'Estat. Laissons gouverner ceux qui nous commandent, & sans nous enquerir ny comment ny pourquoy, croyons qu'ils font le tout pour le

mieux. Ce sont gens qui voyent plus loing que nous sans lunettes. Ils n'ont poil blanc sur la teste qui ne vaille vne raison. Nous n'auons qu'à faire gentiment nos affaires, & à jouir du repos que la Reine nous dōne. C'est de quoy nous nous deuons mesler de par DIEU, & non pas de contreroller comme font quelques vns, les actiōs de nos Maistres. S'ils souffrent que certaines choses aillent autrement qu'elles ne deuroient, il faut croire qu'ils attendent l'occasion plus propre d'y remedier. Les affaires ne se font pas si tost, & quelques fois pour trop hastier on gaste tout. Vous arracherez tous les poils de la queue d'un cheual doucement l'un apres l'autre, au lieu que si vous entreprenez de le faire tout à la fois, vous ne ferez que vous lasser vainement. Vaut-il pas bien mieux auoir vn peu de patience, & rire en attendant qu'on acheue ce qu'on a commencé? Car qu'aduancerions nous aussi par la guerre? Il faudroit outre les desolations & confusions qu'elle amene, que nous payassions la gendarmerie d'une part & d'autre. Puis quand Messieurs les Reformateurs armez s'estants lassez de courre la vache reprendroient enuie d'aller aligner leur parterres & se retirer, on bailleroit à l'un vn gouvernement, à l'autre vn appoinctement plus grand qu'il n'auoit auparauant, & tout cela aux despens du Roy, & par consequent du peuple, sur lequel il faudroit qu'il se rema-

placeast en haussant les railles, faisant nouuel-
les impositions, creant nouueaux offices, &
redoublant en somme les desordres, pour la
correction desquels on demande la guerre.
Ne scait-on pas commēt il nous en a pris au-
tres fois? Le hante tous les iours force gens
d'honneur, & qui scauent que c'est du mon-
de: Ils disent tous que toutes ces plaintes
qu'on fait ne sont qu'artifices de ceux qui
cherchent de peſcher en eau trouble. Prenez
y garde, bonnes gens, & aduertissez en vos
voisins. Le monde se plaint de saine teste.
Qu'est-ce qui manque aux habitans de Paris?
Tout le reste de la France est fait pour eux. Il
n'est pas jusqu'aux pierres qui ne leur portent
du laiſt. Mais si le Roy estoit allé vne fois se-
mer ses mille escus petits dans la Touraine ou
le Poictou durant cinq ou six lunes seulemēt,
ainsi que dernièrement il menaçoit de faire
si on faſchoit sa mere, ma foy il y en auroit de
bien estonnez. Tel bat sa femme si elle ne luy
apporte à chaque repas pinte à six, qui la fe-
roit baiser à tous ses voisins pour auoir seule-
ment de la biere deux fois la semaine. Com-
me nous en estions là dessus, voicy venir cinq
ou six sergents d'un costé & autant d'archers
del'autre, qui saisisſent mes deux cōpagnons,
ceux là pour debte & ceux cy pour crime.
Car ils auoient le iour auparauant desrobé vn
coffre par vn artifice dont ils estoient cou-
stumiers de se seruir. Cela fit que ie ne m'é-

tonnay plus de ce qu'ils desiroient la guerre,
& vouloient louer ma plume pour prescher
la sedition. Car toute cette sorte de gens là
que leur mauuaise fortune ou conscience
presse, ne cherchent que choses nouuelles, &
ne demandent que le changement.

